

ივანე ჯავახიშვილის სახელობის თბილისის სახელმწიფო უნივერსიტეტი
ჰუმანიტარულ მეცნიერებათა ფაკულტეტი

საგანმანათლებლო პროგრამის სახელწოდება: ქართველური ენათმეცნიერება / Georgian (Kartvelian) Linguistics

პროგრამა შედგება ოთხი მოდულისაგან:

- I მოდული,** ძველი და ახალი ქართული სალიტერატურო ენა.
- II მოდული,** ქართველური ენები და დიალექტები.
- III მოდული,** ქართული ენის პრაგმატიკა.
- IV მოდული,** ქართული როგორც მეორე ენა.

მისანიჭებელი კვალიფიკაცია: ქართველური ენათმეცნიერების მაგისტრი / Master of Arts in Georgian (Kartvelian) Linguistics

სპეციალობა: ქართველური ენათმეცნიერება/ Georgian (Kartvelian) Linguistics

პროგრამის მოცულობა კრედიტებით: სამაგისტრო პროგრამა მოიცავს 120 ECTS კრედიტს, რომელიც შემდეგნაირად იშლება: 30 კრედიტი – პროგრამის სავალდებულო კურსები; 30 კრედიტი – ცალკეული მოდულის სავალდებულო კურსები; 30 კრედიტი – სამაგისტრო ნაშრომი
სწავლების ენა: ქართული ენა

პროგრამის მიზანი:

ქართველური ენათმეცნიერების სამაგისტრო პროგრამა მიზნად ისახავს მოამზადოს ქართველური ენების კვალიფიციური სპეციალისტები, კერძოდ, მაგისტრანტებს საფუძვლიანად შეასწავლოს ძველი და ახალი ქართული სალიტერატურო ენისა და ქართველური ენების და დიალექტების ფონეტიკური, მორფოლოგიური და სინტაქსური სტრუქტურები, ქართული ენის პრაგმატიკა და ქართულის როგორც მეორე ენის სწავლების საკითხები. გააცნოს ლინგვისტური კვლევის თანამედროვე მეცნიერული თეორიები, ისტორიულ-შედარებითი და დესკრიპციული ანალიზის პრინციპები, ენის დამუშავების კომპიუტერული მეთოდები; ასწავლოს დიალექტების აღწერის პრინციპები; განუვითაროს დიალექტურ ტექსტებზე მუშაობის უნარი; ანალიტიკური აზროვნება, საკითხისადმი კრიტიკული მიდგომა და მეცნიერული კვლევის უნარი. სამაგისტრო პროგრამა მიზნად ისახავს ქართველური ენების სპეციალობის ფილოლოგთა მომზადებას და ამ სფეროს სპეციალისტთა ინტეგრაციას საერთაშორისო ლინგვისტურ სივრცეში.

ამ შინაარსისა და პროფილის სამაგისტრო პროგრამის შეთავაზება სრულიად ლოგიკურია, რადგან დღეს ქართულის, როგორც საქართველოს სახელმწიფო ენის შესწავლას განსაკუთრებული მნიშვნელობა ენიჭება. ასევე დიდია ქართულის, როგორც მეორე ენის შესწავლისა და სწავლების მნიშვნელობა; ასევე მეტად აქტუალურია ქართული ენის დიალექტებისა და სხვა ქართველური ენების მონაცემების შესწავლა–განხილვა მსოფლიოს სხვადასხვა ენებთან და კულტურებთან მიმართებით. ამიტომ შრომით ბაზარზე ქართულის და ქართველური ენების სპეციალისტებზე მოთხოვნა დიდია.

თსუ ჰუმანიტარულ მეცნიერებათა ფაკულტეტის ქართული ენის ინსტიტუტის სამაგისტრო პროგრამა „ქართველური ენათმეცნიერება“ ითვალისწინებს ივანე ჯავახიშვილის სახელობის თბილისის სახელმწიფო უნივერსიტეტის მისიით გათვალისწინებული მიზნების განხორციელებას. კერძოდ, ორიენტირებულია ეროვნულ და ზოგადსაკაცობრიო ღირებულებების დამკვიდრებაზე, საზოგადოების ინტელექტუალური, ზნეობრივი, კულტურული განვითარების ხელშეწყობაზე;

ტრადიციისა და ინოვაციის ლოგიკურ შერწყმაზე, სტუდენტის პიროვნულ და პროფესიულ განვითარებაზე ზრუნვაზე; სტუდენტზე ორიენტირებულ სწავლებასა და კონკურენტუნარიანი კადრების მომზადებაზე. უნივერსიტეტს აქვს ამ დარგის განვითარების კარგი ტრადიციები და აკადემიური პოტენციალი.

პროგრამაზე დაშვების წინაპირობა:

- ა) საერთო სამაგისტრო გამოცდა.
- ბ) ბაკალავრის ხარისხი ჰუმანიტარულ მეცნიერებათა მიმართულებით, აღმოსავლეთმცოდნეობის და კავკასიოლოგიის მიმართულებით; ან შესაძლებელია გავლილი ჰქონდეს დამატებითი (minor) პროგრამა ქართულ ფილოლოგიას ან გამოყენებით ენათმეცნიერებაში.
- გ) უცხოური (ინგლისური/ გერმანული /ფრანგული) ენის B1 დონეზე ცოდნის დადასტურება გამოცდით ან საერთაშორისო აღიარების მქონე სერთიფიკატით (სამაგისტრო პროგრამის დამთავრებამდე B2 დონემდე ენის ცოდნის გაუმჯობესების პერსპექტივით).
- დ) სასპეციალიზაციო გამოცდა ქართულ ენაში.

სწავლის შედეგი:

ა) ცოდნა და გაცნობიერება

აღნიშნული სამაგისტრო პროგრამის დასრულების შედეგად კურსდამთავრებულს ეცოდინება ქართველური ენები და გაცნობიერებული ექნება ქართველური ენათმეცნიერების კარდინალური საკითხები. მიღებული კვალიფიკაცია, კომპეტენცია და მეცნიერული კვლევის უნარი კურსდამთავრებულს შესაძლებლობას მისცემს გააცნობიეროს ქართველური ენათმეცნიერების ცალკეული პრობლემები, მონახოს ამ პრობლემათა გადაჭრის გზები და შეიმუშაოს ორიგინალური იდეები აღნიშნულ საკითხებთან დაკავშირებით. კერძოდ,

- პირველი მოდულის ბაზაზე კურსდამთავრებულს ეცოდინება ძველი და ახალი ქართული სალიტერატურო ენის სტრუქტურა; გაცნობიერებული ექნება ძველ და ახალ ქართულ სალიტერატურო ენაზე შესრულებული ტექსტების ლინგვისტურად გამართვისა და შესაბამისი სალექსიკონო მასალის ანალიზის პრობლემატიკა. კურსდამთავრებულს შესწავლილი და გაცნობიერებული ექნება თანამედროვე ქართული სალიტერატურო ენის ნორმები.
- მეორე მოდულის ბაზაზე კურსდამთავრებულს ეცოდინება ქართველური ენებისა და ქართული დიალექტების სტრუქტურა; გაცნობიერებული ექნება კოლხურ და სვანურ ენებზე შესრულებული ტექსტებისა და ქართული დიალექტური ტექსტების ლინგვისტურად გამართვისა და შესაბამისი სალექსიკონო მასალის ანალიზის პრობლემატიკა.
- მესამე მოდულის ბაზაზე კურსდამთავრებულისათვის თვალსაჩინო გახდება ენის, კონკრეტულად, ქართული ენის, როლი და ადგილი, აგრეთვე, ლინგვისტიკის, კონკრეტულად ქართული და ქართველური ენათმეცნიერების წვლილი ჰუმანიტარულ მეცნიერებებში.
- მეოთხე მოდულის ბაზაზე კურსდამთავრებულს გაცნობიერებული ექნება ქართულის როგორც მეორე ენის სწავლებისა და შესწავლის პრობლემატიკა. კურსდამთავრებულს ეცოდინება მეორე ენის სწავლებისა და შესწავლის თეორიები და მათი პრაქტიკულად გამოყენების მნიშვნელობა ქართულის როგორც მეორე ენის სწავლების პროცესში.

მაგისტრს აქვს ერთ-ერთი ევროპული ენის (ინგლისურის/ გერმანულის /ფრანგულის) ცოდნა B2 დონეზე მისი სასწავლო და კვლევითი მიზნებისთვის გამოსაყენებლად.

ბ) ცოდნის პრაქტიკული გამოყენება/პრაქტიკული უნარები

კურსდამთავრებული შეიძენს არა მარტო ქართველური ენების სტრუქტურისა და მასთან დაკავშირებული პრაქტიკული საკითხების ცოდნას, არამედ ფართო ჰუმანიტარულ განათლებას, რომელიც აუცილებელია თანამედროვე ინტერდისციპლინური კვლევებისათვის. ყოველივე ეს კურსდამთავრებულს მისცემს შესაძლებლობას, ახალ, გაუთვალისწინებელ და მულტიდისციპლინურ გარემოში თავისუფლად იმოქმედოს, მოიძიოს კომპლექსური პრობლემის გადაწყვეტის ახალი, ორიგინალური გზები და საკუთარი კომპეტენციის ფარგლებში დამოუკიდებლად წარმართოს კვლევა უახლესი მეთოდების გამოყენებით. კერძოდ,

- პირველი მოდულის ბაზაზე კურსდამთავრებულს ექნება უნარი ენათმეცნიერული თვალსაზრისით განიხილოს ძველი და ახალი ქართული სალიტერატურო ენის ტექსტები, გამოსაცემად მოამზადოს ისინი. შეეძლება ბიბლიოგრაფიის მომზადება თანამედროვე ტექნოლოგიების გამოყენებით, ექნება უნარი აწარმოოს ტექსტოლოგიური კვლევა და ძველი და ახალი ქართული სალიტერატურო ენის შესახებ დაწეროს ლინგვისტური გამოკვლევა.
- მეორე მოდულის ბაზაზე კურსდამთავრებულს ექნება უნარი ლინგვისტურად განიხილოს კოლხური, სვანური და ქართული დიალექტური ტექსტები, გამოსაცემად მოამზადოს ისინი. შეეძლება ბიბლიოგრაფიის მომზადება თანამედროვე ტექნოლოგიების გამოყენებით, ექნება უნარი აწარმოოს ტექსტოლოგიური კვლევა, კოლხური და სვანური ენებისა და ქართული დიალექტების შესახებ დაწეროს საენათმეცნიერო გამოკვლევა.
- მესამე მოდულის ბაზაზე კურსდამთავრებულს ექნება უნარი ლინგვოკულტუროლოგიური კვლევის თანამედროვე მეთოდების საშუალებით აწარმოოს რედაქციული სამუშაო ნებისმიერი ტიპის ქართულ ტექსტზე.
- მეოთხე მოდულის ბაზაზე კურსდამთავრებულს ექნება უნარი მიაწოდოს და გასაგები გახადოს ქართული ენის თავისებურებანი როგორც საქართველოში მცხოვრებ არაქართველ მოსახლეობას, ასევე საქართველოში ჩამოსულ უცხოელებს, რომლებიც დაინტერესებულნი არიან ქართულის როგორც მეორე ენის შესწავლის საკითხებით.

მაგისტრს შეუძლია ერთ-ერთ ევროპული ენაზე (ინგლისური, გერმანული, ფრანგული) სასპეციალიზაციო დარგში სამეცნიერო ლიტერატურის გაგება და დამუშავება, ასევე სამეცნიერო ხასიათის ტექსტის შედგენა (საკონფერენციო მოხსენება, სამეცნიერო სტატია და სხვ.) და დარგობრივი პრეზენტაციის მომზადება შესწავლილი ენის შესაბამის უცხოენოვან აუდიტორიაში.

გ) დასკვნის გაკეთების უნარი

ქართული და სხვა ქართველური ენების მონაცემებსა და მათი კვლევის შესაბამის მეთოდოლოგიაზე დაყრდნობით, კურსდამთავრებული მოახერხებს ინფორმაციის ინოვაციურ სინთეზს და რთული (ზოგჯერ არასრული) ინფორმაციის კრიტიკული ანალიზის საფუძველზე დასაბუთებული დასკვნების ჩამოყალიბებას პრობლემურ საკითხებთან დაკავშირებით.

დ) კომუნიკაციის უნარი

კურსდამთავრებულს ექნება უნარი, აკადემიური კეთილსინდისიერების ნორმების დაცვით და საინფორმაციო-საკომუნიკაციო ტექნოლოგიების მიღწევათა გამოყენებით, დაამყაროს კომუნიკაცია აკადემიურ და პროფესიულ საზოგადოებასთან ქართველური ენათმეცნიერების პროგრამის ცალკეული მოდულების მიხედვით ცალკეულ საკითხებთან დაკავშირებით საკუთარი დასკვნების, არგუმენტაციისა და კვლევის მეთოდების შესახებ ქართულ და უცხოურ ენაზე

ე) სწავლის უნარი

ქართველური ენათმეცნიერების სამაგისტრო პროგრამის მოდულებით გათვალისწინებული ქართული და სხვა ქართველური ენების თავისებურებების ცოდნა, ერთი მხრივ, და თანამედროვე საენათმეცნიერო მეთოდების ცოდნა, მეორე მხრივ, მაგისტრის გამოუმუშავებს სწავლის თავისებურებების გაცნობიერების და სტრატეგიულად დაგეგმვის უნარს, რაც მას დაეხმარება დამოუკიდებლად წარმართოს სწავლა.

ვ) ღირებულებები

ქართული და სხვა ქართველური ენების ნიმუშების გაცნობა, ქართველური ენების შესახებ არსებული სამეცნიერო ლიტერატურის შესწავლა მაგისტრს შესაძლებლობას მისცემს შეაფასოს თავისი და სხვისი დამოკიდებულება ღირებულებებისადმი, რაც, თავის მხრივ, აღუძრავს სურვილს, შეიტანოს წვლილი ახალი ღირებულების დამკვიდრებაში.

სწავლის შედეგების მიღწევის მეთოდები:

სწავლის შედეგების მისაღწევად, იმისათვის, რომ მაგისტრმა მიიღოს ღრმა და სისტემური ცოდნა ქართველურ ენათმეცნიერებაში და შეიძინოს ენის სპეციალისტის კარგად განვითარებული, უნივერსალური უნარ-ჩვევები, შეძლოს სპეციალური ტერმინოლოგიისა და ფაქტობრივი მასალის შემოქმედებითი ათვისება, მისი თეორიულ საფუძველზე განზოგადება და სისტემატიზება, შეიმუშაოს ახალი, ორიგინალური იდეები, დამოუკიდებლად გაართვას თავი კომპლექსური თეორიული პრობლემების კვლევას; ახალი კუთხით შეხედოს არა მარტო ტრადიციულ საკითხებს, არამედ თავადაც დასვას ახალი პრობლემები და დასახოს მათი გადაჭრის ინოვაციური გზები; შემოქმედებითად გამოიყენოს ან ორიგინალურად განავითაროს ტრადიციული იდეები, ჰქონდეს ცოდნის პრაქტიკაში გამოყენების უნარი პროგრამაში ლექციის, სამუშაო ჯგუფის, სემინარის, საშინაო დავალების, შუალედური შეფასების, პრეზენტაციის, რეფერატის, ესეს, სამაგისტრო ნაშრომის, დასკვნითი გამოცდის და სხვ. ფორმატში პროგრამაში გამოყენებულია სხვადასხვა მეთოდი: კლასიკური ლექცია, ვერბალური გადმოცემის, ინტერაქტიული სწავლების მეთოდები. წიგნზე მუშაობის მეთოდი, მასალის დაკონსპექტება, ლექცია-სემინარებზე სტუდენტთა ჩართულობა (დისკუსია/დებატების საფუძველზე) პროგრამით გათვალისწინებული საკითხების ათვისების წინაპირობაა. გამოყენებული იქნება ფორმალური ლოგიკის მეთოდები (ინდუქცია, დედუქცია, ახსნა-განმარტებითი მეთოდი, სინთეზი და ანალიზი). სტუდენტის მიერ მასალის ათვისებისათვის გამოყენებული იქნება როგორც ზეპირი (სემინარი), ისე წერიითი მეთოდი.

გამოიყენება შედარებით-ისტორიული ანალიზის მეთოდები. რაც შეეხება ლექციის წარმართვის მეთოდებს, გამოიყენება მონოლოგის, დიალოგისა და მსჯელობის მეთოდები. სემინარული მუშაობის დროს ზოგ შემთხვევაში გამოყენებული იქნება როლურ-სიტუაციური მეთოდი, კერძოდ, სტუდენტების წინასწარ ჯგუფებად დაყოფისა და მათთვის სათანადო კონსულტაციების ჩატარების შემდეგ, შესაძლებელია ჩატარდეს დებატები წინასწარ შერჩეულ თემაზე. ენობრივი და ლიტერატურული პროცესების სისტემური და კომპარატივისტული ანალიზის მეთოდების გამოყენება. აღნიშნული მეთოდები მიზნად ისახავს სტუდენტის სასწავლო პროცესის აქტიურ მონაწილედ ქცევას, ცოდნის დაგროვების პროცესში მის დაინტერესებას და ანალიტიკური აზროვნების უნარის განვითარებას.

სასწავლო პროგრამით გათვალისწინებული თემების სალექციო პრეზენტაცია მიზანშეწონილია კომპიუტერული პროგრამის გამოყენებით. ანალოგიური მეთოდის გამოყენებით შესაძლებელია სტუდენტის მიერ მომზადებული რეფერატის პრეზენტაცია.

სწავლისა და სწავლების მეთოდების ეს ერთობლიობა და მრავალფეროვნება, სწავლისა და სწავლების ეს სტრატეგიები მიმართულია იქითკენ, რომ უზრუნველყოს პროგრამის მიზნებისა და შედეგების შესრულება, რაც ქართული და ქართველური ენების თეორეტიკოსისა და პრაქტიკოსი სპეციალისტის აღზრდას გულისხმობს.

„ქართველური ენათმეცნიერების“ სამაგისტრო პროგრამის სასწავლო კომპონენტის განხორციელებისას გამოიყენება სწავლების სხვადასხვა მეთოდი. ზოგჯერ მეთოდთა შერწყმაც ხდება. პროგრამის შემადგენელი კონკრეტული სასწავლო კურსის სწავლების პროცესში გამოყენებული ფორმატი და სწავლების მეთოდები მითითებულია თითოეული სასწავლო კურსის სილაბუსში.

საბაზისო დარგობრივი ცოდნის შეძენისას სამაგისტრო პროგრამის კურიკულუმში ჩართული თითოეული დისციპლინა თავისი სპეციფიკიდან გამომდინარე ცოდნის მაღალი ხარისხის მისაღწევად ირჩევს სწავლების მეთოდოლოგიურ მიდგომებს, რაც, უწინარეს ყოვლისა, გამოიხატება სწავლებისა და სწავლის სტრატეგიის განსაზღვრაში და დროის მართებულად ორგანიზებაში. განსაკუთრებით დიდი მნიშვნელობა ენიჭება დროის მართებულ განაწილებას და სწავლების მეთოდების სწორად შერჩევას სამუშაო ჯგუფებში, პრაქტიკულ მეცადინეობებსა და პრეზენტაციებისას, რადგან სწორად დაგეგმილი და განხორციელებული ზეპირი კომუნიკაცია სააუდიტორიო მუშაობას უფრო ეფექტურს ხდის.

სტუდენტის ცოდნის შეფასების სისტემა: სტუდენტის ცოდნა ფასდება 100 ქულიანი სისტემით. მინიმალურ შეფასებას წარმოადგენს 51 ქულა. უნივერსიტეტში მოქმედი სასწავლო პროცესის მარეგულირებელი წესის თანახმად შეფასება ხორციელდება შემდეგნაირად: 91-100 _ ფრიადი, A; 81-90 _ ძალიან კარგი, B; 71-80 _ კარგი, C; 61-70 _ დამაკმაყოფილებელი, D; 51-60 _ საკმარისი, E; 41-50 _ ვერ ჩააბარა, FX; 0-40 _ ჩაიჭრა, F.

სამაგისტრო პროგრამის თითოეული სასწავლო კურსის სილაბუსში დეტალურად არის გაწერილი შეფასების ფორმები და კრიტერიუმები. აღნიშნული ინფორმაცია არის საჯარო, ღია და გამჭვირვალე და ხელმისაწვდომია სტუდენტისთვის.

სასწავლო კურსებში ყველაზე ხშირად გამოყენებული შეფასების ფორმებია: წერიტი და ზეპირი საშინაო დავალება, პრეზენტაცია, საკონტროლო წერა, რეფერატის ან ესეს შესრულება, შუალედური გამოცდა (საკითხებით ან ტესტური სახით), წერიტი ან კომბინირებული გამოცდის შეფასება. სასწავლო კურსის სპეციფიკის გათვალისწინებით შეფასების ფორმებს და კრიტერიუმებს ადგენს შესაბამისი სასწავლო კურსის ავტორი/ავტორები.

სწავლების პროცესში განსაკუთრებული მნიშვნელობა ენიჭება სტუდენტთან უკუკავშირს, მათ დროულ და დეტალურ ინფორმირებას შუალედური შეფასების და ფინალური გამოცდის შედეგების შესახებ, შეფასების შედეგების გაცნობას, ანალიზს, ტიპური შეცდომების განხილვას, რაც სტუდენტს საშუალებას აძლევს, სწავლის პროცესში, უკეთ გაიაზროს თავისი შეცდომები, სუსტი მხარეები და იზრუნოს თავის პროფესიულ განვითარებაზე. სტუდენტს აქვს აპელაციის უფლება.

სამაგისტრო პროგრამის დამთავრებამდე, სტუდენტი ასრულებს სამაგისტრო ნაშრომს. ნაშრომი ფასდება 100-ქულიანი სისტემით. რეცენზენტი წერს მაქსიმალურ 40 ქულას, ხოლო სამაგისტრო ნაშრომების დაცვის კომისია მაქსიმალურ 60 ქულას.

დასაქმების სფეროები:

აღნიშნული სამაგისტრო პროგრამის კურსდამთავრებულს როგორც მკვლევარსა და ლექტორს მუშაობა შეეძლება:

- საგანმანათლებლო დაწესებულებებში;
- საქართველოს მეცნიერებათა აკადემიის ჰუმანიტარული პროფილის კვლევით ინსტიტუტებში.
- საქართველოს ეროვნულ ბიბლიოთეკასა და ნებისმიერ სხვა ბიბლიოთეკაში.
- საქართველოს არქივებში.
- ისტორიულ-ეთნოგრაფიულ, ლიტერატურულ და მემორიალურ მუზეუმებში.
- საგამომცემლო ორგანიზაციებში.

დამატებითი ინფორმაცია:

სამაგისტრო პროგრამაზე მისაღები კონტიგენტის რაოდენობა შეადგენს 10 სტუდენტს. ქართველური ენათმეცნიერების მაგისტრანტს არჩევითი საგნის სტატუსით შეუძლია აირჩიოს საგნები მონათესავე სამაგისტრო პროგრამებიდან პროგრამის ხელმძღვანელთან შეთანხმებით.

სასწავლო გეგმა: იხ. დანართი № 2

სილაბუსები: იხ. დანართი № 3

პროგრამის ხელმძღვანელი: რამაზ ქურდაძე, პროფესორი

ინფორმაცია პროგრამის განხორციელებისათვის აუცილებელი ადამიანური რესურსების შესახებ:

- დამანა მელიქიშვილი – ემერიტუსი პროფესორი, პირველი მოდულის თანახელმძღვანელი
- რამაზ ქურდაძე – პროფესორი, მეორე მოდულის ხელმძღვანელი
- სალომე ოშიაძე – ასოცირებული პროფესორი, მესამე მოდულის ხელმძღვანელი
- მერი ნიკოლაიშვილი – ემერიტუსი პროფესორი, მეოთხე მოდულის თანახელმძღვანელი.
- კახა გაბუნია – ასოცირებული პროფესორი, მეოთხე მოდულის თანახელმძღვანელი.
- ანა ხარანაული – ასოცირებული პროფესორი
- დარეჯან თვალთვაძე – პროფესორი
- გიორგი გოგოლაშვილი – ფილოლოგიის მეცნიერებათა დოქტორი, მოწვეული პროფესორი
- ქეთევან დათუკიშვილი – აკადემიური დოქტორი, მოწვეული ლექტორი
- მარინე ბერიძე – აკადემიური დოქტორი, მოწვეული ლექტორი
- რუსუდან ზექალაშვილი – ასოცირებული პროფესორი
- მაია ლომია – ასოცირებული პროფესორი
- ქეთევან მარგიანი-დადვანი მოწვეული ლექტორი
- პაატა ცხადაია - ფილოლოგიის მეცნიერებათა დოქტორი, მოწვეული პროფესორი

ინფორმაცია პროგრამის განხორციელებისათვის აუცილებელი მატერიალური რესურსების შესახებ:

ქართველური ენათმეცნიერების სამაგისტრო პროგრამა ხორციელდება თსუ ჰუმანიტარულ მეცნიერებათა ფაკულტეტის ქართული ენის ინსტიტუტის ბაზაზე. პროგრამის სტუდენტის განკარგულებაშია საერთო საუნივერსიტეტო საბიბლიოთეკო და კომპიუტერული რესურს-ცენტრები, ამასთანავე პროგრამას მჭიდრო კავშირი აქვს ენათმეცნიერების ინსტიტუტთან და ხელნაწერთა ეროვნულ ცენტრთან, სადაც დაცულია უმდიდრესი ქართული სამწერლობო

კულტურის საგანძური. აღნიშნულ ცენტრებში სტაჟირების გავლა მაგისტრანტს მისცემს სასურველ პრაქტიკულ გამოცდილებას და დაეხმარება მას სრულფასოვან სამეცნიერო-პედაგოგიურ კადრად ჩამოყალიბებაში.

პროგრამის ფინანსური უზრუნველყოფა

თსუ ჰუმანიტარულ მეცნიერებათა ფაკულტეტის ქართული ენის ინსტიტუტის „ქართველური ენათმეცნიერების“ სამაგისტრო პროგრამის ფინანსური უზრუნველყოფა ხდება ჰუმანიტარულ მეცნიერებათა ფაკულტეტის ბიუჯეტიდან, რომელიც უნივერსიტეტის ბიუჯეტის შემადგენელ ნაწილს წარმოადგენს. საფაკულტეტო ბიუჯეტი უზრუნველყოფს პროგრამის განხორციელებაში ჩართული აკადემიური პერსონალისა და მოწვეული ლექტორების შრომის ანაზღაურებას, პროგრამის მატერიალურ-ტექნიკური ბაზის მოვლასა და სრულყოფას.